



Continuo P. D. Franciscus Ioseph Grimshaw, arch. Birminghamiensis, sodalis commissionis de sacra Liturgia, emendationes ad cap. I, nn. 10-15, schematis *de sacra Liturgia* illustravit.

Deinde continuata est disceptatio circa schema *de Ecclesia* et ex ordine ad loquendum a praeside vocati sunt: cardd. Franciscus Spellman, arch. Neo-Eboracensis, Ioseph Siri, arch. Ianuensis, Iacobus McIntyre, arch. Angelorum in California, Valerianus Gracias, arch. Bombayensis, Paulus Léger, arch. Marionopolitanus, Iulius Döpfner, arch. Monacensis et Frisingensis; Boleslaus Kominek, arch. tit. Eucaitenus, Franciscus Marty, arch. Remensis, Ioseph Gargitter, ep. Brixinensis, Gerardus Huyghe, ep. Atrebatensis, Dionysius Hurley, arch. Durbanianus, Iulius Barbetta, ep. tit. Pharanitanus, Narcisius Jubany Arnau, ep. tit. Orthosiensis in Phoenicia, aux. Barcinonensis, Ioannes Rupp, ep. Monocensis, Blasius Musto, ep. Aquinatensis, Soranus et Pontiscurvi, Adam Kozlowiecki, arch. Lusakensis.

Hora 12,25 secretarius generalis ex ambone communicavit exitum suffragationum, quae peractae erant circa emendationes ad cap. 1, nn. 10-15, schematis *de sacra Liturgia*. Emendationes approbatae sunt.

Reposito S. Evangelii codice, precibus *Angelus... Agimus...* recitatis, secretarius generalis proximam congregationem generalem die 4 decembris habendam intimavit.

XXXIII

Congregatio generalis tricesima tertia habita est die 4 decembris, feria III, hora 9 matutina. Interfuerunt 2104 Patres, nempe 66 cardinales, 6 patriarchae, 9 primates, 371 archiepiscopi, 1543 episcopi, 10 abbates nullius, 11 praelati nullius, 88 superiores generales.

Missa celebrata est ritu romano a P. D. Hieronymo Rakotomalala, arch. Tananarivensi. Chorus Cappellae Sixtinae exsecutus est cantus: *Da Pacem* (Bartolucci), *Parce Domine* (Bartolucci), *Ecce panis* (Bartolucci), *Domine non sum dignus* (T. L. de Victoria).

Post Missam P. D. Antonius Santin, ep. Tergestinus et Iustinopolitanus, S. Evangelii codicem super paratum thronum statuit, dum Patres *Credo* cantant.

Intimatione facta: *Exeant omnes*, card. Antonius Caggiano, arch. Bonaërens, primi praesidis munere fungens, precem *Adsumus...* recitavit, et secretarius generalis, proclamato ex ambone nomine praesidis congregationis, nomina legit Patrum, qui circa schema *de Ecclesia* loqui postulaverant.

Tunc P. D. Franciscus Šeper, arch. Zagrabiensis, verba fecit ominan-



tia erga Summum Pontificem, et praesidem rogavit ut ad illum omnium affectum atque preces deferret.

Continuata est deinde disceptatio circa schema *de Ecclesia* et a praeside ad loquendum vocati sunt: cardd. Ioseph Frings, arch. Coloniensis, Villemus Godfrey, arch. Vestmonasteriensis, Leo Suenens, arch. Mechliniensis-Bruxellensis, Augustinus Bea, Antonius Bacci, Michaël Browne; Aemilius Blanchet, arch. tit. Philippopolitanus in Thracia, Raphaël Rabban, ep. Cherchensis, Aemilius Guerry, arch. Cameracensis, Raphaël González Moralejo, ep. tit. Emausensis, Thomas Holland, ep. tit. Etennensis, coad. Portus Magni, Albertus Devoto, ep. Goyanensis, Ioseph Vairo, ep. Gravinensis et Montis Pelusii, Franciscus Hengsbach, ep. EsSENDIENSIS, Michaël Doumith, ep. Sarbensis, Ioseph Descuffi, arch. Smyrnensis.

Durante congregatione Patribus distributus est fasciculus continens emendationes ad cap. 1, nn. 16-31, schematis *de sacra Liturgia*, et relationem circa eas.

Hora 12,20 reposito S. Evangelii codice, praeses preces *Angelus... Agimus...* recitavit, et secretarius generalis proximam congregationem generalem die 5 decembris habendam intimavit.

XXXIV

Congregatio generalis tricesima quarta habita est die 5 decembris, feria IV, hora 9 ante meridiem. Interfuerunt 2113 Patres, nempe 66 cardinales, 7 patriarchae, 9 primates, 375 archiepiscopi, 1550 episcopi, 10 abbates nullius, 11 praelati nullius, 85 superiores generales.

Missa de Spiritu Sancto celebrata est ritu romano a P. D. Emmanuele da Silveira d'Elboux, arch. Curitibensi. Chorus Cappellae Sixtinae executus est cantus: *Alma Redemptoris* (Bartolucci), *O salutaris hostia* (Bartolucci), *O sacrum convivium* (Bartolucci).

Post Missam P. D. Carolus Splett, ep. Gedanensis, S. Evangelii codicem super paratum thronum statuit, dum chorus et Patres cantant *Christus vincit* cum Ps. 116.

Intimatione facta: *Exeant omnes*, card. Bernardus Alfrink, arch. Ultraiectensis, primi praesidis munere fungens, precem *Adsumus...* recitavit, et secretarius generalis, proclamato nomine praesidis congregationis, annuntiavit distributionem ceterarum emendationum ad cap. 1 schematis *de sacra Liturgia*, necnon fasciculi continentis summatim schemata constitutionum et decretorum, quae a commissionibus praeparatoriis confecta erant.